

政情：工聯會養兵搶攻功能組別

(刊於 2008-01-03 東方日報)

雖然人大常委會已經表明，香港最快可以喺二〇一七及二〇二〇年實行雙普選，但係港澳辦副主任張曉明上星期喺香港出席政制座談會時，就特別提到功能組別對香港貢獻良多，強調功能組別同普選並非對立，似乎留咗條尾，意味着功能組別議席有可能會永久保留，只係以乜嘢形式保留而已。

其實呢個想法並非乜嘢新事物，香港各大黨派早已作出準備，例如過往形象草根嘅民建聯，近年就致力轉型招收更多中產同專業界黨員。就連大力要求全面取消功能組別嘅民主黨同公民黨，早前亦都成立咗個標榜中產專業嘅衛星組織**公共專業聯盟**。

連過去只派人參選勞工界功能組別嘅工聯會，亦都因應呢個新形勢積極招兵買馬。工聯會會長鄭耀棠尋日向傳媒簡介工聯會六十周年會慶時，就提到希望喺今年同二〇一〇年，將會員人數再增加一到兩成，務求達到卅三萬至卅五萬人。除咗針對傳統粉絲基層工會同新移民，亦會加強吸納中產同專業人士，好似早前佢哋就新加咗幾個金融服務同保險界嘅工會，嚟緊仲有兩個會計界同法律界工會成立，喺社工界亦都有類似聲音。

建議擴闊選民基礎

秘密練兵之餘，棠哥仲建議透過擴闊功能組別嘅選民基礎，以「一人兩票」方式嚟達至普選，例如除咗註冊會計師，將來連喺會計師樓打工嘅掃地阿孀，都可以喺會計界功能

組別投票。呢個方案變相將現有嘅工商同專業界功能組別，變晒做跨階層甚至以基層為主嘅新勞工界別，對會員眾多嘅工聯會最有利。

棠哥否認有關建議同部署，係為咗將來嘅功能組別普選鋪路，但就透露依家已經有專業人士，尋求工聯會支持佢哋參加明年嘅立法會功能組別選舉，擺明係提早練兵。最特別嘅係，棠哥尋日揀咗喺位於中環金融區嘅一個工聯會屬會會址同傳媒茶敘，記者一入門口就望到大大個股票報價電視機添，似乎工聯會真係刻意經營、尋求轉型喎！